



O'ZBEKISTON RESPUBLIKASI  
IQTISODIYOT VA MOLIYA  
VAZIRLIGI

# 2025 I yarim yillik HISOBOT

VAZIRLIK VA IDORALARNING  
ICHKI AUDIT XIZMATLARI  
FAOLIYATINI BAHOLASH  
NATIJALARI



Toshkent 2025-yil



## **MUNDARIJA**

<b>REZYUME .....</b>	<b>3</b>
<b>1. ICHKI AUDIT XIZMATLARI FAOLIYATINI BAHOLASHNING QONUNCHILIK ASOSLARI VA TASHKIL ETILISHI .....</b>	<b>4</b>
<b>1.1. Baholashga oid amaldagi qonunchilik .....</b>	<b>4</b>
<b>1.2. Baholash bo'yicha savolnoma .....</b>	<b>4</b>
<b>1.3. 2025-yil uchun baholash rejasi.....</b>	<b>6</b>
<b>2. BAHOLASH NATIJALARI BO'YICHA UMUMIY MA'LUMOTLAR .....</b>	<b>6</b>
<b>3. BAHOLASH NATIJALARI ASOSIDA ICHKI AUDIT FAOLIYATINI YANADA TAKOMILLASHTIRISH UCHUN KIRITILGAN TAKLIFLAR HAMDA ULARNING IJROSI .....</b>	<b>9</b>
<b>4. REJALASHTIRILGAN ISHLAR.....</b>	<b>10</b>
<b>5. YAKUNIY QISM.....</b>	<b>11</b>
<b>Vazirlik va idoralar kesimida baholash natijalari (<i>ilova</i>) .....</b>	<b>12</b>

## REZYUME

Bugungi kunda vazirlik va idoralarda ichki audit xizmatlari (keyingi o'rinlarda – ichki audit xizmatlari) **budjet intizomini mustahkamlash** (I), **budjet to'g'risidagi qonunchilik buzilishi holatlarining oldini olish** (II), **budjet tizimi budjetlaridan foydalanish samaradorligini baholash** (III) maqsadida faoliyat olib bormoqda.

O'z navbatida, O'zbekiston Respublikasi Vazirlar Mahkamasining 2023-yil 14-avgustdagi 377-sonli qarori bilan tasdiqlangan Vazirlik va idoralarning ichki audit xizmatlari faoliyatini baholash tartibi to'g'risidagi nizomga muvofiq, ichki audit faoliyatiga oid qonunchilik hujjatlariga rioya etilishini ta'minlash hamda faoliyatni takomillashtirib borish maqsadida **iqtisodiyot va moliya vazirligi tomonidan ichki audit xizmatlari faoliyatini baholash** (keyingi o'rinlarda - baholash) **amalga oshirildi**.

2025-yilda **5 turdagi** xavf omillarining tahlili asosida tanlab olingan **13 ta** vazirlik va idoralarning ichki audit xizmatlarida (*jami ichki audit xizmatlari mavjud bo'lgan vazirlik va idoralarning **22 foizi***) **baholash o'tkazilishi rejalashtirilgan** bo'lib, shundan, joriy yilning birinchi yarmida **5 ta** vazirlikning ichki audit xizmatlari faoliyati (*yillik rejaning **38 foizi***) baholandi.

Baholash ichki audit xizmatlari faoliyatini tegishli qonunchilik hujjatlari asosida tashkil etilishi, xavf tahlili tizimining yo'lga qo'yilishi, ichki audit tadbirlarining qonunchilikka muvofiq o'tkazilishi va natijalarining rasmiylashtirilishi, audit tadbirlari natijasida ishlab chiqilgan taklif va tavsiya (chora-tadbir)larning ijro etilishi va xodimlarning malaka darajasini qamrab olgan 7 ta yo'nalishdagi namunaviy savolnomaga ball berish orqali amalga oshirildi.

**Ma'lumot uchun:** Baholash natijalariga ko'ra, ichki audit xizmati faoliyatining sifat darajasi 90 foiz va undan yuqori bo'lganda "yuqori", 70-90 foiz oralig'ida bo'lganda "o'rta", 70 foizdan kam bo'lganda "past" deb baholanadi.

Baholash natijasiga ko'ra, **1 ta (20%)** vazirlikda ichki audit xizmati faoliyati "**yuqori**" va yana **1 ta (20%)** vazirlikda "**o'rta**" hamda qolgan **3 ta (60%)** vazirliklarda "**past**" darajada baholandi (*jamlanma ma'lumot mazkur hisobotning **2-qismida** keltiriladi*).

Baholash doirasida quyidagi masalalarni o'z ichiga oluvchi **chora-tadbirlar rejalari ishlab chiqilib, vazirlik va idora birinchi rahbarlari tomonidan tasdiqlandi:**

ichki audit xizmatlarining ichki hujjatlarini ichki auditga oid qonunchilikka muvofiqlashtirish;

xavf tahlili sifatini oshirish;

ichki audit tadbirlarining o'tkazilishi va natijalarining rasmiylashtirilishini qonunchilik hujjatlariga muvofiqligini ta'minlash;

xodimlarning malakasini oshirib borish va kadrlar zaxirasini shakllantirish;

ichki audit xizmatlarida ichki baholashni yo'lga qo'yish.

Ichki audit xizmatlari tomonidan mazkur chora-tadbirlar rejasida belgilangan vazifalar ijrosi hamda ichki audit xizmati faoliyatini yanada takomillashtirish yuzasidan amalga oshirilgan ishlar to'g'risida har chorak yakunida hisobotlar taqdim etilib kelinmoqda.

# 1. ICHKI AUDIT XIZMATLARI FAOLIYATINI BAHOLASHNING QONUNCHILIK ASOSLARI VA TASHKIL ETILISHI

## 1.1. Baholashga oid amaldagi qonunchilik

Mamlakatimizda ichki audit xizmatlari faoliyatining ichki auditga oid qonunchilik hujjatlariga muvofiqligini o'rganish maqsadida, ularning faoliyatini baholash amaliyoti yo'lga qo'yilgan. Xususan, baholash jarayoni O'zbekiston Respublikasi Vazirlar Mahkamasining 2023-yil 14-avgustdagi 377-sonli qarori bilan tasdiqlangan Vazirlik va idoralarning ichki audit xizmatlari faoliyatini baholash tartibi to'g'risidagi nizomga asosan Iqtisodiyot va moliya vazirligi tomonidan har yili quyidagi tartibda amalga oshiriladi:

ichki audit xizmatlari faoliyatiga oid ma'lumotlardan foydalangan holda xavf tahlilini amalga oshirish hamda mazkur tahlil natijalari asosida baholash o'tkaziladigan ichki audit xizmatlarini tanlab olish va baholash rejasini ishlab chiqish;

baholash to'g'risida vazirlik va idorani xabardor qilgan holda ichki audit xizmati faoliyatini o'n ish kunidan oshmagan muddatda baholash;

## 1.2. Baholash bo'yicha savolnoma

Ichki audit xizmatlari faoliyatini baholash belgilangan tartibda baholash bo'yicha namunaviy savolnomaga ball berish orqali amalga oshiriladi. O'z navbatida, baholash bo'yicha savolnoma quyidagi yo'nalishlardagi savollarni o'z ichiga oladi:

ichki audit xizmati faoliyatining belgilangan tartibda tashkil etilishi, mustaqilligi hamda resurslar bilan ta'minlanishi;

ichki audit xizmati faoliyatiga oid tegishli ichki hujjatlarning qabul qilinishi;

ichki audit yillik rejasining xavf tahlili asosida ishlab chiqilishi;

baholash natijalari bo'yicha ma'lumotnoma rasmiylashtirish, ichki audit xizmati faoliyatini takomillashtirish bo'yicha berilgan taklif va tavsiyalar asosida chora-tadbirlar rejasini ishlab chiqish;

ichki audit xizmatlari tomonidan chora-tadbirlar rejasining bajarilishi monitoringini amalga oshirish.

O'tkazilgan baholash natijalariga ko'ra, ichki audit xizmati faoliyatining sifat darajasi quyidagicha baholanadi:

90 foiz va undan yuqori bo'lganda, "yuqori";

70 foizdan (shu jumladan, 70 foiz) 90 foizgacha bo'lganda, "o'rta";

70 foizdan kam bo'lganda, "past".

Bunda, sifat darajasi ko'rsatkichi har bir yo'nalishdagi savollarga berilgan ballar yig'indisining ushbu yo'nalishdagi savollarga berilishi mumkin bo'lgan eng yuqori ballar yig'indisiga nisbatini belgilangan vaznga ko'paytirish orqali aniqlanadi.

ichki audit tadbirlarining qonunchilikka muvofiq o'tkazilishi va natijalarining rasmiylashtirilishi;

chora-tadbirlar rejasining bajarilishi;

ichki audit xizmati xodimlarining malaka darajasi hamda faoliyati samaradorligining baholanishi;

ichki audit xizmati faoliyatiga alohida savollar.

Shuningdek, savolnomadagi yo'nalishlarning ichki audit xizmatlari faoliyati samaradorligini ta'minlash va rivojlantirish nuqtayi nazaridan muhimligidan kelib chiqib, ularga vazn belgilangan. (1-jadval).

**Ichki audit xizmatlari faoliyatini baholash bo'yicha namunaviy savollar yo'nalishlariga belgilangan vaznlar miqdori**

<b>T/r</b>	<b>Baholash savollari yo'nalishi</b>	<b>Vazn</b>
1.	Ichki audit xizmati faoliyatining belgilangan tartibda tashkil etilishi, mustaqilligi hamda resurslar bilan ta'minlanishi	0,10
2.	Ichki audit xizmati faoliyatiga oid tegishli ichki hujjatlarning qabul qilinishi	0,10
3.	Ichki audit yillik rejasining xavf tahlili asosida ishlab chiqilishi	0,20
4.	Ichki audit tadbirlarining qonunchilikka muvofiq o'tkazilishi va natijalarining rasmiylashtirilishi	0,20
5.	Chora-tadbirlar rejasining bajarilishi	0,20
6.	Ichki audit xizmati xodimlarining malaka darajasi hamda faoliyati samaradorligining baholanishi	0,15
7.	Ichki audit xizmati faoliyatiga alohida savollar	0,05

Yuqoridagi jadvalda ko'rsatilgandek, **ichki audit yillik rejasining xavf tahlili asosida ishlab chiqilishi (0,20), ichki audit tadbirlarining qonunchilikka muvofiq o'tkazilishi va natijalarining rasmiylashtirilishi (0,20) va chora-tadbirlar rejasining bajarilishi (0,20)** yo'nalishlariga yuqori vazn belgilangan.

Bunga asosiy sabab sifatida ilg'or xalqaro tajribalarda, hususan, Jahon bankining Davlat xarajatlari va moliyaviy hisobdorlik (PEFA) dasturi<sup>1</sup> tomonidan o'tkaziladigan baholash jarayonida ichki audit komponenti uchun ichki audit yillik rejalarining bajarilishi, ichki audit tadbirlarining o'tkazilishi va natijalarining rasmiylashtirilishi hamda taklif va tavsiyalarning amaliyotga tatbiq etilishi asosiy indikatorlar hisoblanishini keltirib o'tish mumkin.

*Ma'lumot uchun: Mamlakatimiz vazirlik va idoralarining ichki audit xizmatlari faoliyati 2024-yilda Jahon bankining davlat xarajatlari va moliyaviy hisobdorlik (PEFA) mezonlari bo'yicha xalqaro ilg'or standartlarga **"muvofiq" (B+)** deb baholandi (2019-yilda ushbu natija "qoniqarsiz" (D+) deb baholangan).*

<sup>1</sup> Davlat xarajatlari va moliyaviy hisobdorlik samaradorligini baholash uslubiyoti  
<https://www.pefa.org>

### 1.3. 2025-yil uchun baholash rejasi

Iqtisodiyot va moliya vazirligining 2025-yil 22-fevraldagi 23-43-sonli buyrug'i bilan 2025-yil uchun vazirlik va idoralarning ichki audit xizmatlari faoliyatini baholash yillik rejasi tasdiqlandi.

Mazkur rejaga xavf tahlili asosida tanlab olingan yuqori xavf darajasiga ega ichki audit xizmatlari kiritilgan.

#### 2-jadval

#### Ichki audit xizmatlari faoliyatini baholash yillik rejasi

T/r	Vazirlik va idora nomi	Baholash o'tkazish muddati
1.	Transport vazirligi	17.03.2025 – 28.03.2025
2.	Maktabgacha va maktab ta'limi vazirligi	07.04.2025 – 18.04.2025
3.	Ekologiya, atrof-muhitni muhofaza qilish va iqlim o'zgarishi vazirligi	28.04.2025 – 08.05.2025
4.	Madaniyat vazirligi	19.05.2025 – 30.05.2025
5.	Adliya vazirligi	09.06.2025 – 20.06.2025
6.	Qishloq xo'jaligi vazirligi	30.06.2025 – 11.07.2025
7.	Turizm qo'mitasi	21.07.2025 – 01.08.2025
8.	Yoshlar ishlari agentligi	11.08.2025 – 22.08.2025
9.	Ijtimoiy himoya milliy agentligi	02.09.2025 – 12.09.2025
10.	O'zbekiston texnik jihatdan tartibga solish agentligi	22.09.2025 – 03.10.2025
11.	O'zarxiv agentligi	13.10.2025 – 24.10.2025
12.	Fanlar akademiyasi	03.11.2025 – 14.11.2025
13.	Kadastr agentligi	24.11.2025 – 05.12.2025

## 2. BAHOLASH NATIJALARI BO'YICHA UMUMIY MA'LUMOTLAR

Baholash yillik rejasiga muvofiq 2025-yilning birinchi yarmi davomida **5 ta vazirliklarda**, jumladan, Transport vazirligi, Maktabgacha va maktab ta'limi vazirligi, Ekologiya, atrof-muhitni muhofaza qilish va iqlim o'zgarishi vazirligi, Madaniyat vazirligi va Adliya vazirliklarida ichki audit xizmatlari faoliyati baholashdan o'tkazildi.

Baholash natijasiga ko'ra, **Transport vazirligi (62,2%), Ekologiya, atrof-muhitni muhofaza qilish va iqlim o'zgarishi vazirligi (64,3%), Maktabgacha va maktab ta'limi vazirligi (66,7%)**, ichki audit xizmatlari faoliyatining sifat darajasi "**past**", Madaniyat vazirligi (**81,3%**) ichki audit xizmatining sifat darajasi "**o'rta**" hamda Adliya vazirligi (**92,4%**) ichki audit xizmati faoliyatining sifat darajasi "**yuqori**" darajada baholandi (1-rasm).

## 2025-yilning I yarim yilligida ichki audit xizmatlari faoliyatini baholash natijalari

T/r	Nazorat savollari yo'nalishi	Adliya vazirligi	Madaniyat vazirligi	Maktabgacha va maktab ta'limi vazirligi	Ekologiya vazirligi	Transport vazirligi
<b>Sifat darajasi (foizda)</b>		<b>92,4%</b>	<b>81,3%</b>	<b>66,7%</b>	<b>64,3%</b>	<b>62,2%</b>
1	Ichki audit xizmati xodimlarining malaka darajasi hamda faoliyati samaradorligining baholanishi	92%	83%	100%	100%	100%
2	Ichki audit xizmati faoliyatining belgilangan tartibda tashkil etilishi	100%	78%	83%	100%	78%
3	Ichki audit xizmati ichki hujjatlarning qabul qilinishi	100%	83%	67%	100%	67%
4	Ichki audit tadbirlarining qonunchilikka muvofiq o'tkazilishi	89%	75%	100%	61%	79%
5	Ichki audit xizmati faoliyatiga alohida savollar	92%	79%	83%	43%	92%
6	Chora-tadbirlar rejasining bajarilishi	94%	100%	38%	56%	25%
7	Yillik rejaning xavf tahlili asosida ishlab chiqilishi	88%	69%	25%	19%	38%

 – yuqori   
 – o'rta   
 – past

Yuqoridagi rasmda baholash yo'nalishlari bo'yicha vazirliklar ichki audit xizmatlari faoliyatining sifat darajasi aks ettirilgan. Bunda, ichki audit xizmatining sifat darajasi har bir yo'nalish natijalaridan kelib chiqib aniqlangan.

Baholash jarayonida **ichki audit xizmati xodimlarining malaka darajasi va faoliyati samaradorligining baholanishi** hamda **ichki audit xizmati faoliyatining belgilangan tartibda tashkil etilishi, mustaqilligi va resurslar bilan ta'minlanishi** yo'nalishlari bo'yicha aksariyat vazirlik va idoralarda **"yuqori"** (90 foiz va undan yuqori) natijalar qayd etildi.

Shunday bo'lsada, **ichki audit yillik rejasining xavf tahlili asosida ishlab chiqilishi** yo'nalishida *Ekologiya, atrof-muhitni muhofaza qilish va iqlim o'zgarishi* vazirligi (19%), *Maktabgacha va maktab ta'limi* vazirligi (25%), *Transport* vazirligi (38%) hamda *Madaniyat* vazirligida (69%) **"past"** darajadagi natijalar qayd etildi.

**Chora-tadbirlar rejasining bajarilishi** yo'nalishi bo'yicha *Transport* vazirligi (25%), *Maktabgacha va maktab ta'limi* vazirligi (38%) hamda *Ekologiya, atrof-muhitni muhofaza qilish va iqlim o'zgarishi* vazirligida (56%) natijalar **"past"** darajada ekanligi aniqlandi.

Shuningdek, baholashda **ichki audit tadbirlarining qonunchilikka muvofiq o'tkazilishi va natijalarining rasmiylashtirilishi** yo'nalishida ichki audit xizmati tomonidan **ichki audit tadbirlari uchun belgilangan tartibda dastur ishlab chiqilmaganligi, o'tkazilgan ichki audit tadbirlari natijalari "Davlat auditi" dasturiga kiritilmaganligi** hamda **faoliyati yuzasidan birinchi rahbarga hisobotlar taqdim etib borilmaganligi** sababli *Ekologiya, atrof-muhitni muhofaza qilish va iqlim o'zgarishi* vazirligida (61%) nisbatan **"past"** darajadagi natijalar qayd etildi.

Shu bilan birga, **ichki audit xizmati faoliyatiga oid tegishli ichki hujjatlarning qabul qilinishi** yo'nalishi bo'yicha ko'rsatkichlar boshqa yo'nalishlarga nisbatan past darajada qolmoqda. Bunga asosiy sabab sifatida vazirliklarning **ichki audit xizmati to'g'risidagi (ichki) nizomi hamda ichki audit xizmati xodimlarining lavozim yo'riqnomalari** Ichki audit xizmati to'g'risidagi **namunaviy nizomga muvofiq holda ishlab chiqilmaganligini** (ichki hujjatlarda namunaviy nizomda belgilanmagan vazifalarning nazarda tutilganligini) keltirib o'tish mumkin.

Mazkur yo'nalishda *Transport* vazirligi (67%) hamda *Maktabgacha va maktab ta'limi* vazirligi (67%) ichki audit xizmatlari faoliyati **"past"** darajada baholangan.

Savolnomaning **ichki audit xizmati faoliyatiga oid boshqa savollar** yo'nalishida ichki audit xizmatlari tomonidan **Iqtisodiyot va moliya vazirligining faoliyat yuzasidan oldingi baholashda berilgan taklif va tavsiyalari bajarilmaganligi** hamda **tizimdagi budjet hisobidan moliyalashtirilmaydigan nobudjet muassasa va tashkilotlarda moliyaviy-xo'jalik faoliyati bo'yicha o'tkazilgan audit (nazorat) ishlariga oid hujjatlar monitoringi yuritilmaganligi** sababli *Ekologiya, atrof-muhitni muhofaza qilish va iqlim o'zgarishi* vazirligida (43%) **"past"** darajadagi natijalar qayd etildi.

Baholash natijalari bo'yicha vazirlik va idoralar kesimidagi batafsil ma'lumotlar mazkur Hisobotga **ilovada** keltirib o'tilgan.

### **3. BAHOLASH NATIJALARI ASOSIDA ICHKI AUDIT FAOLIYATINI YANADA TAKOMILLASHTIRISH UCHUN KIRITILGAN TAKLIFLAR HAMDA ULARNING IJROSI**

2025-yil davomida o'tkazilgan baholash natijalari asosida ichki audit xizmatlari faoliyatida yo'l qo'yilgan kamchiliklar, tizimli muammolarni bartaraf etish, shuningdek, ichki audit xizmatlarining faoliyatini yanada takomillashtirish maqsadida har bir vazirlikda chora-tadbirlar rejalari ishlab chiqildi.

Xususan, ichki audit xizmatlari faoliyatida mavjud kamchiliklarni bartaraf etish yuzasidan quyidagi masalalar bo'yicha taklif va tavsiyalar berildi:

#### **Ichki audit xizmati faoliyatining belgilangan tartibda tashkil etilishi hamda faoliyatga oid ichki hujjatlarning rasmiylashtirilishi bo'yicha:**

ichki audit xizmatining bo'ysunuvi va hisobdorligini vazirlik va idoraning birinchi rahbariga belgilanishini tashkil etish;

ichki audit xizmati to'g'risidagi nizom hamda xodimlar lavozim yo'riqnomalarini ichki auditga oid amaldagi qonunchilik hujjatlariga muvofiqlashtirish;

#### **Ichki audit yillik rejasini belgilangan tartibda ishlab chiqish bo'yicha:**

ichki audit yillik rejasini xavf tahlili asosida ishlab chiqish va xavf tahlilini takomillashtirish;

ichki audit yillik rejasini mavjud vaqt resurslarini hisobga olgan holda ishlab chiqish;

#### **Ichki audit tadbirlarining o'tkazilishini samaradorligini oshirish bo'yicha:**

ichki audit tadbirlarining o'tkazilishi va natijalarining rasmiylashtirilishini ichki audit faoliyatiga oid qonunchilikka muvofiq amalga oshirilishini ta'minlash;

ichki audit tadbirlari natijalari bo'yicha chora-tadbirlar rejasini belgilangan tartibda tuzish hamda ijrosining monitoringini amalga oshirish;

ichki audit tadbirlari natijalarini belgilangan muddatlarda "Davlat auditi" dasturiy kompleksiga kiritish;

ichki audit tadbirlarini o'tkazishda asosiy e'tiborni qonunchilik hujjatlarining buzilishi holatlarining oldini olishga (profilaktikaga) qaratish;

axborot texnologiyalaridan foydalangan holda masofaviy auditni amalga oshirish;

Hisob palatasi tomonidan taqdim etilgan xavf-tahlillar bo'yicha audit tadbirlarini o'tkazish to'g'risida tegishli choralar ko'rish;

ichki audit xizmati faoliyati bo'yicha hisobotlarni vazirlik va idora rahbariga taqdim etib borish hamda ommaviy axborot vositalari orqali jamoatchilikka e'lon qilish;

tizimdagi budget hisobidan moliyalashtirilmaydigan nobudget muassasa va tashkilotlarda moliyaviy-xo'jalik faoliyati bo'yicha o'tkazilgan nazorat ishlariga oid hujjatlar monitoringini yuritish;

O'zbekiston Respublikasi Prezidenti-ning qarorlari bilan belgilangan samaradorlik indikatorlarining bajarilishini tahlil qilish va baholab borish;

#### **Ichki audit xizmatida samarali kadrlar siyosatini yo'lga qo'yish bo'yicha:**

vazirlik va idorada ichki audit faoliyatini amalga oshirish uchun ichki audit xizmati xodimlarining (shtat birliklarining) yetarililigini ko'rib chiqish;

xodimlar malakasini doimiy oshirib borish, shuningdek, ichki audit xizmatida mavjud vakant lavozimlarni malakali kadrlar bilan to'ldirish hamda ichki audit xizmati uchun kadrlar zaxirasini yaratish;

ichki audit xizmati xodimlarining faoliyati samaradorligini eng muhim samaradorlik ko'rsatkichlar asosida baholash;

### **Ichki audit faoliyatini rivojlantirish bo'yicha boshqa masalalar:**

ichki auditning xalqaro ilg'or tajribalarini o'rganish;

vazirlik tizimidagi tashkilotlarda tashkil etilgan ichki audit xizmatlari bilan hamkorlik hamda hisobdorlikni yo'lga qo'yish;

ichki audit xizmatining vazirlik va idorada "Xavflarni boshqarish" qo'mitasining ishchi organi sifatida faoliyatini yo'lga qo'yish;

ichki audit xizmatiga o'z faoliyatini amalga oshirish uchun ichki va tashqi axborot tizimlaridan foydalanish imkoniyatini yaratish;

## **4. REJALASHTIRILGAN ISHLAR**

Vazirlik va idoralarning ichki audit xizmatlari faoliyatini baholashni amalga oshirish bo'yicha 2025-yilning ikkinchi yarmi davomida quyidagi ishlarni amalga oshirish rejalashtirilmoqda:

yillik reja asosida 2025-yilning ikkinchi yarmiga belgilangan vazirlik va idoralarda ichki audit xizmatlari faoliyati yuzasidan baholash amalga oshiriladi;

tajriba – sinov tariqasida 2025–2026-yillar davomida ichki audit faoliyatini samarali tashkil etish maqsadida Iqtisodiyot va moliya vazirligi hamda o'zaro kelishilgan yana bir vazirlikda "Namunali ichki audit xizmati" loyihasini amalga oshiriladi;

Baholash natijasida "**past**" darajada baholangan yo'nalishlarni yaxshilash bo'yicha vazirlik va idoralar bilan muntazam va yaqindan ishlar olib boriladi hamda 2025-yilning birinchi yarmida baholash o'tkazilgan ichki audit xizmatlari tomonidan chora-tadbirlar rejasini bajarilishi monitoringi davom ettiriladi;

ichki nazorat jarayonlarini takomillashtirish.

O'z navbatida, baholash o'tkazilgan vazirliklar tomonidan **ichki audit xizmatlari faoliyatini yanada takomillashtirish bo'yicha quyidagilar amalga oshirildi:**

Transport vazirligi hamda Maktabgacha va maktab ta'limi vazirliklarida ichki audit xizmati to'g'risidagi nizomlar va xodimlar lavozim yo'riqnomalarining ichki auditga oid amaldagi qonunchilik hujjatlariga muvofiqligi ta'minlandi.

Ichki audit xizmati xodimlarini Iqtisodiyot va moliya vazirligi O'quv markazida malakasini oshirish choralari ko'riladi hamda faoliyatga oid milliy va xorijiy ekspertlar ishtirokida o'quv seminarlar va treninglar o'tkazilib boriladi.

Shu bilan birga, o'rta va uzoq muddatli rejalarda ichki audit xizmatlari faoliyatini baholash tizimini ilg'or xorij tajribalari asosida doimiy takomillashtirib borish va raqamlashtirish nazarda tutilgan.

## 5. YAKUNIY QISM

2025-yilning birinchi yarmida ichki audit xizmatlari faoliyatini baholash tizimining yo'lga qo'yilishi natijasida vazirlik va idoralarda ichki audit faoliyatini yaxshilash bo'yicha bir qator ijobiy natijalarga erishildi. Jumladan:

ichki audit xizmatlari faoliyatiga oid amaldagi qonunchilik hujjatlarining mazmuni, mohiyati va ahamiyati hamda ulardan foydalanish ichki audit xizmatlari xodimlariga atroflicha yetkazildi;

ichki audit tuzilmalarida mavjud muammolar aniqlanib bartaraf etish choralari ko'rildi;

ichki audit xizmatlariga oid ichki hujjatlarning qonunchilikka muvofiq ishlab chiqilishi va tasdiqlanishi ta'minlandi;

ichki audit xizmatlarining mustaqilligi huquqiy va tashkiliy jihatdan ta'minlandi;

ichki audit xizmatlari faoliyatining xavf tahliliga yo'naltirilishi bo'yicha amaliy yordam ko'rsatildi, xavf tahlilini tashkil etish hamda baholash bo'yicha xodimlarning bilim va ko'nikmalari oshirildi;

ichki audit tadbirlarining belgilangan tartibda rasmiylashtirilishi, taklif va tavsiyalarning ishlab chiqilishi va bajarilishi muhimligi bo'yicha uslubiy yordam ko'rsatildi;

ichki audit xizmatlari xodimlarini, bevosita baholash jarayonida malakasini oshirish choralari ko'rildi.

## Vazirlik va idoralar kesimida baholash natijalari

### Transport vazirligi

Transport vazirligida Ichki audit xizmati faoliyatini baholash 2025-yilning 17-martidan 28-martiga qadar amalga oshirildi. Unga ko'ra, Ichki audit xizmati faoliyatining **sifat darajasi 62,2 foiz ko'rsatkich bilan "past" darajada baholandi.**

Baholash natijasida, ichki audit xizmati faoliyatiga oid ichki hujjatlarning qabul qilinishi (**12 balldan 8 ball (67%)**), ichki audit yillik rejasining xavf tahlili asosida ishlab chiqilishi (**16 balldan 6 ball (38%)**), ichki audit tadbirlarining qonunchilikka muvofiq o'tkazilishi va natijalarining rasmiylashtirilishi (**28 balldan 22 ball (79%)**), chora-tadbirlar rejasining bajarilishi (**16 balldan 4 ball (25%)**) yo'nalishlari bo'yicha **quyidagi takomillashtirilishi lozim bo'lgan holatlar aniqlandi:**

1. Ichki audit xizmati faoliyatini amalga oshirish bo'yicha tegishli hujjatlar ishlab chiqilishi va rasmiylashtirilishi yo'nalishi bo'yicha ichki audit xizmati nizomi **namunaviy nizomga muvofiq ishlab chiqilmagan.** Jumladan, nizomda:

ichki audit xizmati **faoliyatiga aralashuvlarga yo'l qo'yilmaslik** hamda unga **o'z faoliyatidan tashqari boshqa faoliyatga oid vazifalarning yuklanishiga cheklov(lar);**

**ichki audit tadbirlarida ishtirok etishga yoki ushbu tadbirlarni o'tkazishga yo'l qo'yilmaslik holatlari bo'yicha talablar** (manfaatlar to'qnashuviga yo'l qo'yilmaslik va oldini olish choralari ko'rish) **belgilanmagan.**

2. Ichki audit yillik rejasining xavf tahlili asosida ishlab chiqilishi va rasmiylashtirilishi yo'nalishi bo'yicha 2024-yilning rejasini ishlab chiqish uchun o'tkazilgan xavf tahliliga **barcha ichki audit obyektlari qamrab olinmagan.**

Shu bilan birga, o'tkazilgan xavf tahliliga ko'ra **xavf darajasi yuqori bo'lgan ichki audit obyektlari yillik rejaga to'liq kiritilmagan.** Yillik rejani ishlab chiqishda **mavjud vaqt resurslari hisobga olinmagan.**

3. Ichki audit tadbirlarining qonunchilikka muvofiq o'tkazilishi va natijalarining rasmiylashtirilishi yo'nalishi bo'yicha ichki audit tadbirida aniqlangan qonunbuzilish holatlarida **jinoyat alomati mavjud bo'lganda bu to'g'risida birinchi rahbarga xabardor qilinmagan**

Shuningdek, vazirlikning **budget dasturlari ijrosi belgilangan yo'nalishlarda baholanmagan** hamda baholash natijalari bo'yicha **taklif va tavsiyalar ishlab chiqilmagan.**


4. Chora-tadbirlar rejasining ichki audit obyektlari tomonidan bajarilishi yo'nalishi bo'yicha 2024-yilda o'tkazilgan **ichki audit tadbirlari natijalari yuzasidan chora-tadbirlar rejasi tuzilmagan.**

Shu bilan birga, 2024-yil davomida **qonunchilik hujjatlarining buzilishi holatlarining oldini olish (profilaktika) amalga oshirilmagan.**

Bundan tashqari, 2024-yil uchun tasdiqlangan **yillik reja 25 foizga bajarilgan.**

**Baholash natijasiga ko'ra,** vazirlikning ichki audit xizmati (ichki) nizomi Ichki audit xizmati to'g'risidagi namunaviy nizomga muvofiq holda qayta tasdiqlandi. Ichki audit tadbirlarining o'tkazilishi, natijalarining rasmiylashtirilishi hamda audit tadbirlari natijalari bo'yicha chora-tadbirlar rejasining ishlab chiqilishi Ichki audit tadbirlarini o'tkazish qo'llanmasiga muvofiq holda yo'lga qo'yildi.

### Transport vazirligining ichki audit xizmati faoliyatini baholash natijalari



- ① Ichki audit xizmati faoliyatining belgilangan tartibda tashkil etilishi
- ② Ichki audit xizmati ichki hujjatlarning qabul qilinishi
- ③ Chora-tadbirlar rejasining bajarilishi
- ④ Ichki audit xizmati xodimlarining malaka darajasi
- ⑤ Ichki audit xizmati faoliyatiga alohida savollar
- ⑥ Ichki audit tadbirlarining qonunchilikka muvofiq o'tkazilishi
- ⑦ Yillik rejaning xavf tahlili asosida ishlab chiqilishi

## Ekologiya, atrof-muhitni muhofaza qilish va iqlim o'zgarishi vazirligi

Ekologiya, atrof-muhitni muhofaza qilish va iqlim o'zgarishi vazirligida Ichki audit bo'limi faoliyatini baholash 2025-yil 28-apreldan 8-mayga qadar amalga oshirildi. Unga ko'ra, bo'lim faoliyatining **sifat darajasi 64,3 foiz ko'rsatkich bilan "past" darajada baholandi.**

Baholash natijasida, ichki audit yillik rejasining xavf tahlili asosida ishlab chiqilishi (**16 balldan 3 ball (19%)**), ichki audit tadbirlarining qonunchilikka muvofiq o'tkazilishi va natijalarining rasmiylashtirilishi (**28 balldan 17 ball (61%)**), chora-tadbirlar rejasining bajarilishi (**16 balldan 9 ball (56%)**), ichki audit xizmati faoliyatiga oid boshqa savollar (**14 balldan 6 ball (43%)**) yo'nalishlari bo'yicha **quyidagi takomillashtirilishi lozim bo'lgan holatlar aniqlandi:**

1. Ichki audit yillik rejasining xavf tahlili asosida ishlab chiqilishi va rasmiylashtirilishi yo'nalishi bo'yicha 2024-yilning rejasi **xavf tahlili o'tkazilmagan holda ishlab chiqilgan** va shu sababli hisobot davrida **rejadan tashqari audit tadbirlarini o'tkazish sezilarli darajada ko'paygan.**

Yillik rejani ishlab chiqishda **mavjud vaqt resurslari hisobga olinmagan.**

2. Ichki audit tadbirlarining ichki auditga oid qonunchilik hujjatlariga muvofiq o'tkazilishi va natijalarining rasmiylashtirilishi yo'nalishi bo'yicha **ichki audit tadbirlari uchun dastur ishlab chiqilmagan** va o'tkazilgan ichki audit tadbirlarining **natijalari "Davlat auditi" dasturiga kiritilmagan** hamda bo'lim faoliyati bo'yicha **hisobotlar birinchi rahbarga kiritilmagan.**

Shuningdek, vazirlikning **budget dasturlari ijrosi belgilangan yo'nalishlarda baholanmagan** hamda baholash natijalari bo'yicha **taklif va tavsiyalar ishlab chiqilmagan.**

3. Chora-tadbirlar rejasining bajarilishi yo'nalishi bo'yicha ichki audit bo'limi tomonidan 2025-yilda o'tkazilgan ichki audit tadbirlari natijalari bo'yicha **chora-tadbirlar rejasining bajarilishi monitoringi yo'lga qo'yilmagan.**

Shu bilan birga, 2024-yil uchun tasdiqlangan **yillik reja 22 foizga bajarilgan.**

4. Ichki audit xizmati faoliyatiga oid boshqa savollar yo'nalishi bo'yicha ichki audit bo'limiga o'z faoliyatini amalga oshirish uchun **ichki va tashqi axborot tizimlaridan foydalanish imkoniyati yaratilmagan.**


Vazirlik tizimdagi budget hisobidan moliyalashtirilmaydigan nobudget muassasa hamda tashkilotlarda moliyaviy-xo'jalik faoliyati bo'yicha **o'tkazilgan audit (nazorat) ishlariga oid hujjatlar monitoringi yuritilmagan.**

Bundan tashqari, ichki audit bo'limi faoliyati bo'yicha Iqtisodiyot va moliya vazirligi tomonidan **oldingi baholashda berilgan taklif va tavsiyalar bajarilmagan.**

**Baholash natijasiga ko'ra,** ichki audit bo'limi tomonidan yillik rejaning xavf tahlili asosida ishlab chiqilishi bo'yicha tushuntirish berildi. Shuningdek, ichki audit tadbirlarining o'tkazilishi va natijalari bo'yicha ishlab chiqilgan chora-tadbirlar rejasining bajarilishi monitoringi Ichki audit tadbirlarini o'tkazish qo'llanmasiga (ro'yxat raqami 3406, 27.12.2022-yil) muvofiq holda yo'lga qo'yildi.

Vazirlikning budget dasturlari ijrosi bo'yicha hisobotlarni belgilangan barcha yo'nalishlarda baholanishi va natijalari yuzasidan taklif va tavsiyalar ishlab chiqilishi bo'yicha tushuntirishlar berildi.

### Ekologiya vazirligining ichki audit xizmati faoliyatini baholash natijalari



- 1 Ichki audit xizmati xodimlarining malaka darajasi
- 2 Ichki audit xizmati faoliyatining belgilangan tartibda tashkil etilishi
- 3 Ichki audit xizmati ichki hujjatlarning qabul qilinishi
- 4 Ichki audit tadbirlarining qonunchilikka muvofiq o'tkazilishi
- 5 Chora-tadbirlar rejasining bajarilishi
- 6 Ichki audit xizmati faoliyatiga alohida savollar
- 7 Yillik rejaning xavf tahlili asosida ishlab chiqilishi

## Maktabgacha va maktab ta'limi vazirligi

Maktabgacha va maktab ta'limi vazirligida Ichki audit va moliyaviy nazorat departamenti faoliyatini baholash 2025-yilning 7-aprelidan 18-apreliga qadar amalga oshirildi. Unga ko'ra, departamentning **sifat darajasi 66,7 foiz ko'rsatkich bilan "past" darajada baholandi.**

Baholash natijasida, ichki audit xizmati faoliyatiga oid tegishli ichki hujjatlarning qabul qilinishi (**12 balldan 8 ball (67%)**), ichki audit yillik rejasining xavf tahlili asosida ishlab chiqilishi (**16 balldan 4 ball (25%)**), chora-tadbirlar rejasining bajarilishi (**16 balldan 6 ball (38%)**), ichki audit xizmati faoliyatiga oid boshqa savollar (**12 balldan 10 ball (83%)**), yo'nalishlari bo'yicha **quyidagi takomillashtirilishi lozim bo'lgan holatlar aniqlandi:**

1. Ichki audit xizmati faoliyatiga oid tegishli ichki hujjatlarning qabul qilinishi yo'nalishi bo'yicha departament nizomi va xodimlar lavozim yo'riqnomalarida **namunaviy nizomga muvofiq bo'lmagan bandlari mavjud.** Jumladan, ushbu hujjatlarda **tekshirish va nazorat tadbirlari bilan bog'liq vazifalar**, shuningdek, vazirlikda murojaatlar bilan ishlash bo'yicha **"Ishonch telefoni" faoliyatini tashkil etish vazifasi belgilangan.**

Shu bilan birga, ichki nizomda departamentga o'z faoliyatidan tashqari **boshqa faoliyatga oid vazifalarning yuklanishiga cheklov(lar) belgilanmagan.**

2. Ichki audit yillik rejasining xavf tahlili asosida ishlab chiqilishi va rasmiylashtirilishi yo'nalishi bo'yicha 2024-yilning rejasini ishlab chiqish uchun o'tkazilgan xavf tahliliga **barcha ichki audit obyektlari qamrab olinmagan.**

Shu bilan birga, o'tkazilgan xavf tahliliga ko'ra **xavf darajasi yuqori bo'lgan ichki audit obyektlari yillik rejaga to'liq kiritilmagan.** Yillik rejani ishlab chiqishda mavjud vaqt resurslari hisobga olinmagan.

Bundan tashqari, hisobot davrida o'tkazilgan audit tadbirlari tarkibida **rejadan tashqari tadbirlar ulushi 20 foizdan ortiq qismni tashkil qilgan.**

3. Chora-tadbirlar rejasining bajarilishi yo'nalishi bo'yicha departament tomonidan 2024-yilda o'tkazilgan ichki audit tadbirlari natijalari bo'yicha **chora-tadbirlar rejasi belgilangan tartibda tuzilmagan** hamda ularning bajarilishi bo'yicha **monitoring yuritilmagan.**

Shu bilan birga, 2024-yil uchun tasdiqlangan **yillik reja 63 foizga bajarilgan.**

Bundan tashqari, departamentning barcha xodimlariga masofaviy audit o'tkazish uchun **"O'zASBO" dasturiy majmuasidan foydalanishga imkoniyat yaratilmagan (login va parollar olinmagan).**


4. Ichki audit xizmati faoliyatiga oid boshqa savollar yo'nalishi bo'yicha fuqarolar ishtirokidagi audit tizimi bo'yicha **nazorat obyektlari "Davlat auditi" dasturiy kompleksiga to'liq kiritilmagan.**

**Baholash natijasiga ko'ra,** vazirlikning ichki audit xizmati (ichki) nizomi hamda xodimlar lavozim yo'riqnomalari Ichki audit xizmati to'g'risidagi namunaviy nizomga muvofiq holda qayta tasdiqlandi.

Shuningdek, departamentning yillik rejasini vazirlikning barcha ichki audit obyektlarini qamrab olgan xavf tahlili asosida ishlab chiqish va bunda mavjud vaqt resurslarini inobatga olish bo'yicha tushuntirish berildi.

Axborot texnologiyalaridan foydalanilgan holda masofaviy audit qamrovini oshirish maqsadida, departamentning barcha xodimlariga "O'zASBO" dasturiy majmuasidan foydalanish uchun login va parollar olinishi lozimligi bildirildi.

**Maktabgacha va maktab ta'limi vazirligining ichki audit xizmati faoliyatini baholash natijalari**



- ① Ichki audit xizmati xodimlarining malaka darajasi
- ② Ichki audit tadbirlarining qonunchilikka muvofiq o'tkazilishi
- ③ Ichki audit xizmati faoliyatiga alohida savollar
- ④ Ichki audit xizmati faoliyatining belgilangan tartibda tashkil etilishi
- ⑤ Ichki audit xizmati ichki hujjatlarning qabul qilinishi
- ⑥ Chora-tadbirlar rejasining bajarilishi
- ⑦ Yillik rejaning xavf tahlili asosida ishlab chiqilishi

## Madaniyat vazirligi

Madaniyat vazirligida Ichki audit bo'limi faoliyatini baholash 2025-yilning 19-maydan 30-mayiga qadar amalga oshirildi. Unga ko'ra Ichki audit bo'limi faoliyatining **sifat darajasi 81,3 foiz ko'rsatkich bilan "o'rta" darajada baholandi.**

Baholash natijasida, ichki audit xizmati faoliyatining belgilangan tartibda tashkil etilishi, mustaqilligi hamda resurslar bilan ta'minlanishi (*18 balldan 14 ball (78%)*), ichki audit yillik rejasining xavf tahlili asosida ishlab chiqilishi (*16 balldan 11 ball (69%)*), ichki audit tadbirlarining qonunchilikka muvofiq o'tkazilishi va natijalarining rasmiylashtirilishi (*28 balldan 21 ball (75%)*), ichki audit xizmati faoliyatiga oid boshqa savollar (*14 balldan 11 ball (79%)*) yo'nalishlari bo'yicha **quyidagi takomillashtirilishi lozim bo'lgan holatlar aniqlandi:**

1. Ichki audit xizmati faoliyatining belgilangan tartibda tashkil etilishi, mustaqilligi hamda resurslar bilan ta'minlanishi yo'nalishi bo'yicha vazirlikda ichki audit bo'limining **bo'syuvu va hisobdorligi birinchi rahbarga belgilanmagan.**

2. Ichki audit yillik rejasining xavf tahlili asosida ishlab chiqilishi va rasmiylashtirilishi yo'nalishi bo'yicha 2024-yil uchun yillik rejani ishlab chiqishda, o'tkazilgan xavf tahliliga ko'ra **xavf darajasi yuqori bo'lgan ichki audit obyektlari yillik rejaga to'liq kiritilmagan.**

Shu bilan birga, hisobot davrida o'tkazilgan audit tadbirlari tarkibida **rejadan tashqari tadbirlar ulushi 20 foizdan ortiq qismni tashkil qilgan.**

3. Ichki audit tadbirlarining ichki audit faoliyatiga oid qonunchilik hujjatlariga muvofiq o'tkazilishi va natijalari rasmiylashtirilishi yo'nalishi bo'yicha ichki audit bo'limi tomonidan **ichki audit tadbirlari uchun dasturlar ishlab chiqilmagan.**

Shuningdek, vazirlikning **budget dasturlari ijrosi belgilangan yo'nalishlarda baholanmagan** hamda baholash natijalari bo'yicha **taklif va tavsiyalar ishlab chiqilmagan.**


Bundan tashqari, ichki audit bo'limi faoliyati bo'yicha **hisobotlar vazirlikning birinchi rahbariga kiritib borilmagan.**

4. Ichki audit xizmati faoliyatiga oid boshqa savollar yo'nalishi bo'yicha ichki audit bo'limi faoliyati bo'yicha Iqtisodiyot va moliya vazirligi tomonidan **oldingi baholashda berilgan taklif va tavsiyalar bajarilmagan.**

**Baholash natijasiga ko'ra,** ichki audit yillik rejasini xavf tahlili asosida ishlab chiqilishi hamda mavjud vaqt resurslarining to'g'ri rejalashtirilishi tushuntirildi.

Vazirlikning budget dasturlari ijrosi bo'yicha hisobotlarni belgilangan barcha yo'nalishlarda baholanishi va natijalari yuzasidan budget mablag'laridan yanada samarali va natijali foydalanishga qaratilgan taklif va tavsiyalar ishlab chiqilishi bo'yicha tushuntirishlar berildi.

### Madaniyat vazirligining ichki audit xizmati faoliyatini baholash natijalari



- ① Chora-tadbirlar rejasining bajarilishi
- ② Ichki audit xizmati ichki hujjatlarning qabul qilinishi
- ③ Ichki audit xizmati xodimlarining malaka darajasi
- ④ Ichki audit xizmati faoliyatiga alohida savollar
- ⑤ Ichki audit xizmati faoliyatining belgilangan tartibda tashkil etilishi
- ⑥ Ichki audit tadbirlarining qonunchilikka muvofiq o'tkazilishi
- ⑦ Yillik rejaning xavf tahlili asosida ishlab chiqilishi

## Adliya vazirligi

Adliya vazirligida Ichki audit bo'limi faoliyatini baholash 2025-yilning 9-iyunidan 20-iyuniga qadar amalga oshirildi. Unga ko'ra ichki audit bo'limi faoliyatining **sifat darajasi 92,4 foiz ko'rsatkich bilan "yuqori" darajada baholandi.**

Baholash natijasiga ko'ra, vazirlikda ichki audit xizmati faoliyatining belgilangan tartibda tashkil etilishi, mustaqilligi hamda resurslar bilan ta'minlanishi (**18 balldan 18 ball (100%)**), ichki audit xizmati faoliyatiga oid tegishli ichki hujjatlarning qabul qilinishi (**12 balldan 12 ball (100%)**), chora-tadbirlar rejasining bajarilishi (**16 balldan 15 ball (94%)**) hamda ichki audit xizmati xodimlarining malaka darajasi va faoliyati samaradorligining baholanishi (**12 balldan 11 ball (92%)**) yo'nalishlari bo'yicha **ishlar yetarli darajada amalga oshirilganligi ma'lum bo'ldi.**


O'z navbatida, baholashda ichki audit yillik rejasining xavf tahlili asosida ishlab chiqilishi (**16 balldan 14 ball (88%)**), ichki audit tadbirlarining qonunchilikka muvofiq o'tkazilishi va natijalarining rasmiylashtirilishi (**28 balldan 25 ball (89%)**), yo'nalishlari bo'yicha **quyidagi takomillashtirilishi lozim bo'lgan holatlar aniqlandi:**

1. Ichki audit yillik rejasining xavf tahlili asosida ishlab chiqilishi va rasmiylashtirilishi yo'nalishi bo'yicha 2024-yil davomida o'tkazilgan audit tadbirlari tarkibida **rejadan tashqari tadbirlar ulushi 20 foizdan ortiq qismni tashkil qilgan.**

2. Ichki audit tadbirlarining ichki audit faoliyatiga oid qonunchilik hujjatlariga muvofiq o'tkazilishi va natijalari rasmiylashtirilishi yo'nalishi bo'yicha vazirlikning budget dasturlari ijrosi bo'yicha **hisobotlar belgilangan yo'nalishlarda baholanmagan** hamda baholash natijalari bo'yicha **taklif va tavsiyalar ishlab chiqilmagan.**

**Baholash natijasiga ko'ra,** vazirlikning budget dasturlari ijrosi bo'yicha hisobotlarni belgilangan barcha yo'nalishlarda baholanishi va natijalari yuzasidan budget mablag'laridan yanada samarali va natijali foydalanishga qaratilgan taklif va tavsiyalar ishlab chiqilishi bo'yicha tushuntirishlar berildi.

### Adliya vazirligining ichki audit xizmati faoliyatini baholash natijalari



- ① Ichki audit xizmati faoliyatining belgilangan tartibda tashkil etilishi
- ② Ichki audit xizmati ichki hujjatlarning qabul qilinishi
- ③ Chora-tadbirlar rejasining bajarilishi
- ④ Ichki audit xizmati xodimlarining malaka darajasi
- ⑤ Ichki audit xizmati faoliyatiga alohida savollar
- ⑥ Ichki audit tadbirlarining qonunchilikka muvofiq o'tkazilishi
- ⑦ Yillik rejaning xavf tahlili asosida ishlab chiqilishi